

Chuailo

Forthnightly Newsletter



Vol. No. XI Issue No. 2

KOLKATA MIZO STUDENTS'

27th April., 2014 (Sunday)

KMS EXECUTIVE COMMITTEE VAWIKHATNA NEIH A NI

2014-2015 chhunga KMS Executive committee hmasa ber chu Dt.12.04.14 khan Mizoram House Ballygunge 1st floor-ah neih a ni a, thil pawimawh hrang hrang rel a ni; Committee member an kal tha hle.

Pu Lalzuiliana Sailo hnen atangin OB leh Committee member-te hriat tur pawimawh hrang hrang ngaihthlak a nih hnuah thurel chhonzawm a ni a, Admission chungchang, Summer sports, Annual magazine leh thil pawimawh hrang hrang rel a ni.

Zirlai lo kal thar turte admission chungchanga lo buaipui dan tur sawiho a ni a, hemi chungchangah hian CU in kaldan an thlak danglam deuh avangin lo zir chiang turin President leh Gen.Secretary-te ruat an ni.

Summer Sports lo awm turah hian KMS chuan tel ve leh ngei tha a ti a, hemi atan hian incharge turte chu Sports Sub Committee-in a lo ngaihtuah tura dah a ni.

KMS T-SHIRT

KMS T-Shirt siam a ni dawn a, a design tur pawh peihfel a ni tawh a, Rs 350/- man tura ruahman a ni. Lei theuh turin lo inring ang u.

Sum tuakna chikhat atan lucky ticket siam a ni leh dawn bawk a, heihi Freshers' Social-ah vawr tura ruahman a ni, lei theuh kan tum dawn nia.

CHUAILO KUM SAWM

Chuailo newsletter chuan dt.16.05.14 hian kum 10 a lo tling dawn ta reng mai a, a lawmna atan special issue buatsaih tum a ni a, hemi atan hian article leh thuziak hrang hrangrawn thawh turin kan sawm a che u.

Annual magazine siam leh tur chungchang rel niin Editor atan Lalanzova Darngawn ruat a ni a, Editorial Board member turte chu Editor kutah a awm ang.

Nikum lama KMS Music Video siam tura rel tawh chu tihhlawhtlin tum nise tia rel a ni a, a tul anga hma lo la turin Committee members Samuel Lalhriatpui leh Lalruatfela Ralte te ruat an ni.

Information lama kan lo chak zawk theih na'n KMS chuan hmalak tha a ti a, hemi chungchang ah hian chak taka hmalak nghal niin **chhiatni thatni ah rang taka member-te'n kan hriat nghal vek theihna turin ruahmanna siam a ni a, heihi phone message-a dawn tura duan a ni.**

Summer Sports' 2014

Dt.10.06.14 -13.06.14 inkar hian Mizoram pawna zirlai, nipui chawlh hmang mekte tana buatsaih thin 'Summer Sports' chu neih leh tur a ni a, he hun ah hian KMS pawh kan tel ve leh dawn a, hemi hun laia kan member chawlh hmanga Mizorama cham mek leh kan member hlui, Kolkata-a lo awm tawh thin zawng zawngte chu KMS tana thahnemngai taka thawkchhuak thin turin kan inngen a ni.

Summer Sports hi kumtin zirlai chawlh hmang mekte tana buatsaih thin a ni a, State hrang hranga zirlaite'n kan inbuatsaih chhawk thin a ni; Kuminah hian Delhi Mizo Zirlai Pawl(DMZP) in summer Sports hi an huaihawt ang.

Tualchhung...

Good Friday leh Easter Sunday tluang taka hman zawh a ni a, nuam kan tiin kan hlawkpui tlang hle.

Dt.18.04.14 Good Friday khan Biakin ah inkhawm niin Lalpa Zanriah kan kilho bawk, Biakin inkhawm kan thahnem hle a ni. Hemi ni hian zaikhawm hranpa kan nei lo.

Dt.20.04.14 zingkarah Mizoram House Ballygunge kawtzawlah Sunrise Service hun kan hmang a, mi thahnem tak kan kalkhawm a, thingpui leh Easter egg te ei hoin hun hlimawm tak kan hmang.

Chhun lamah Biakin ah inkhawmna hun kan nei a, inkhawm banah Mizoram House Salt Lake-ah zaikhawm niin, hun hlimawm leh nuam tak kan hmang ho leh a ni. Hemi hunah hian Thingpui leh Biryani ruai kilho a ni.

LAWMTHU

Kan bawngsa pickle siam min lo leisak tu zawng zawngte chungah KMS chuan lawmthu a sawi a; Pickle siamna atana phal taka Mizoram House min hman tirtu Pu Talo Rosanga Additional Resident Commissioner, kan Senior Adviser ni bawk chungah kan lawm hle a ni.

Kan hma maiah hian sachek siamin kan rawn zuar leh dawn a, tlawmngaia min lo leisak leh theuh turin kan ngen a che u.

Harsatna hi mi ropuite tan chaw tha a ni

CHUAILO

Estd. May, 2004

Editor : Lalanzova Darngawn

Joint Editors : Lalruatkima

: Vanlalpeki Ralte

: Vanlalthuma

Patron : Alex Rosangluaia

Contact : 8420509618/9831106143



Enkawltu Kamliam

A tha thei ang berin...

Zawhna pawimawh tak chu ‘Miin tunge i nih?’ an tih hi a ni a; chu aia pawimawh leh zual nangmah kha ‘Tunge i nih?’ tih hi a ni.

Kan thianpa pakhatin a tia lawm, “Gospel Camping kan nei a, keini rawlthar/leirawl rual ho kha Counsellor pakhat hian min kawikhawm a. Pathian thu te min sawipui a, zawhna leh chhanna hun te kan hmang ho a. Nakinah chuan ka cousin te in bul a mi chu ‘Tu fa nge i nih i inhria em? tiin a zawt a. Chu leirawl chuan ‘Hria e, ka nu leh pa fa..’ a han ti a. Counsellor chuan, ‘Ni lo.. sual fa i nih kha.. setana fa..’ a han ti a. Chuveleh, ka cousin chuan, ‘Setana fa a ni lo, chumi leh chumi fa chu a sin (a nu leh pa hmang a sawi a.)’ a ti a. Counsellor pawh chu a ngawi hlauh mai alawm..’ tiin a sawi.

Ni e, mi min hmuh dan hi a pawimawh a ni. Rampum miss pawh ni se, a awmna khuate khan hmeltha an tih tlat loh chuan a awmna khuaah chuan hralh a tla lo ve khawp ang. Chutiang chiah chuan, eng pawh ti ila, mi min hmuh dan kha a pawimawh tih hriat reng a tha.

Thil hriatreng ngai pakhat chu- mi kan va hmuh danah thuthlukna kan siam dawnin kan inenfiah hmasak phawt hi a tha. Mahni engmah ni si lova mi kan va hmuh hniam khan mahni kan indah hniam mai mai a ni tih hi kan hriat fo a tha a ni. Tha ber leh dik bera kan inggaih a, chu kan inggaihna chu midang hmuh hniamnana kan hman chuan kha kan tehna hmang khan midangin min lo teh ve se kan tling ve tho angem le? He zawhna hi i hre reng dawn nia.

A tawp berah chuan heti hian kan fuih teh ang che. Thil engpawh i hmaah tihtur a awm a; kha thil tih turah khan i hmang a lang a nih chuan a tha thei ang berin tih tum thin ang che. Mahni hma zawn chu mahni vekin kan sut kuak a ngai.

Miin an thlir che a, an hmu hniam che a ni thei e.. pawiti suh..midang thlirna mai mai che a nia, i rilru leh i ngaihtuahna tak tak kha an rawn hre pha lo. Chu aia pawimawh zawk chu nangmah ngei khan ‘Tunge i ni i intih le?’

-Lalruatkima Mapuia

Zirna Huang...

Medical Profession

-Dr. Opa

Medical profession kan tih hian doctor leh nurse hi rilru-ah a lo lang nghal phawt mai a. Kolkata-a Mizo zirlai tamzawk hi general stream studies zirlai kan nih avangin medical profession lam hian min hip vak lovin kan tihtur ni lovin kan ngai deuh thin awm e. Hospital changkang apiangah doctor tha deuh deuchte awm thin mahse, damdawi in leh health care changkang zawk chuan anni puitu "Allied Health Professional"-te hi an pawimawh hle a ni. Science stream (BSc) la i nih chuan diploma/ BSc course hrang hrang, kum 1-2 vel zir ngai lak theih a tam a. A vaiin ka tarlang seng lo a, a tlanglawn deuchte leh mamawhna tam zawkte chu:

Medical Records: Damdawi ina damlo file leh number system mumal tak leh fel taka vawngtu; an hna hi a pawimawhin, a thiam deuh chuan hlauh a tha in, mamawhna (demand) a sang thei hle

Radiology/imaging technician: X-ray, scan tih vel a khawl buaipuitu ber, damlo leh khawl khawihtu (doctor-te chu a result lo report tu an nia). MRI, CT-scan leh PET scan vel nal taka khawih thiam chu Mizo zingah hian ka la awm kher lo ang

Respiratory technician: Mizoram-ah pawh ICU a awm ve nual ta a, a la awm zel dawn chauh a. ICU-a damlo te hi tam tak chu khawl hmangin thawktir anni a. Hetiang khawl khawihtu leh damlo natna azira khawih thiam bik hi kan la mamawh dawn chauh a ni

Anaesthesia technician: Hnimhlum petu chu anaesthetist doctor a ni a, a tlangpuiin nurse senior emaw, tualchher puitu (4th grade) emaw-in an tawiawm thin a. A bika trained technician hi inzaina hmun awmna ah chuan mamawh anni reng a ni

Audiology and Speech language pathology: ENT doctor in beng lam thalo leh hriatna tlem-te en thin mahse, anni tluka pawimawh chu hemi te hi an ni. Khawl hrang hrang hmangin hriatna thalo test leh enkawl zir a ni a. Mizoram-ah hian pahnih khat bak kan la awm lo awm e

Science stream la lo tan pawh medical professional a nih theih a.

Hospital administration: Damdawi in tan rorel dan hi lehkha thiam tak tak tan pawh thil harsa tak a ni a. Hospital administration hi diploma leh degree a lak theih a.

(Phek 4-naah chhunzawm a ni e...)

Article :

KOLKATA-AH ENGTIN NGE HUN I HMAN VE?**- Loma Intoate**

Kolkata khawpuiah hian Mizo zirlai leh zirlai lo pawh thahnem tak kan lo awm ve ta a; kan hun hman dan, kan nunphung leh kan chetzia pawh kan mizia a inan loh ang bawkin a inang lo fur awm e. Zirlai ho bik han thlur bing ta ila. Zirlai kan nih angin nu leh pa te emaw chungte emaw chawmhlawm hmang a zirnaran sang bel tura helai hmuna awm kan nih theuh a rinawm a. Thenkhat chu nu leh pa te thawhchhuah leh neih chuang liam hmanga chawmhlawm kan ni thei a, thenkhat eiruk emaw sum thianghlim lo hmanga chawmhlawm pawh kan ni thei ang, thenkhat erawh nu leh pa te'n nitin kawla ni chhuak chhiara an thlawhma atanga harsa taka min chawm hram hram pawh kan ni thei awm e.

Kolkata-ah hian Mizo hmengin pawl hrang hrang-KMS, CMCS leh CMWA te a awm tih chu kan hre theuh awm e. Heng pawl hrang hrang te hian kumkhat chhungin programme leh hun pawimawh tak tak a huaihawt thin a, heng hunah te hian i kal ve thin em? Nge hetiang hun hi an lo hmang thin tih pawh hre lovin i lo awm zawk? I kal ve thin a nih pawhin a chanvo nei chi (fatu, tantu, usher leh a dangte) angin i kal nge a mipui satliah angin i kal zawk? A nih loh vek pawhin rui nawi ve takin a bengchheng pawl leh mi mit ti kham zawngin i kal thin zawk? Mahni theuh han in en let ila kan awmdan zawng zawng chu tu hrilh leh vak chuang ngai tawh lovin kan in hre thei mai awm e.

Ti hian han in zawt ila; Mizorama kan haw chhoh hunah Kolkata Mizote'n min chawimawina certificate emaw min ui zia lantirna certificate nen kan haw dawn nge, engmah zir chhuak tak tak si lo leh tu hriat hlauh vak lovin a hmanga phaia awm satliah ang mai maiin kan hawn dawn zawk? Thil Chiang tak pakhat chu Kolkata-a hei leh chen awm ve tawh si kan thil tih khawmna hmunpui ber Mizoram House awmna pawh hre lo leh a kal dan tur pawh hre lo khawpa awm chu hnamdang ngaizawng emaw mahni P.G./inluah a ruihtheih thil ti nasa ho an ni duh tlangpui.

KMS emaw CMCS Thalai Pawl te'n Programme a neih nikhuain in thiante'n kal ve tura an sawm chein ti hian i chhang ve thin em, "thianpa/thiannu nang chu i inhmanga hmehriat tha te i ngah a, kei chu ka ni ve si lova rawn kal ve a zathlak a lawm". Hetianga i thiante sawmna i chhan fo chuan engtikah mah i tan inhmanna hun leh hmehriat tha neihna hun i nei lovang. Hei hi hre reng la, i thianpa/thiannu khan a tirah nangmah ang tho khan hmehriat tha a nei bik hauh lo! Inthlahrung leh zah pawh dawn lova heng programme-ah te hian thahnem ngai taka a kal hram hram vang chauh a ni.

Pawla inhman chu a pawimawh viau ami? Zirna a tih sukuk phah thei a sin, ti a lo sawi pawl pawh a awm theih viau a mahse hna zawna kawngah han sawi ta ila, interview board a thu thin te hian hna zawng tura rawn interview thin te zingah "Pawla inhmang leh inhmang lo chu danglam tak an ni" tiin an sawi kan hre fo awm e. College-ah pawh Presentation han tih nikhuain kan thiante zingah pawla inhmang te danglamzia chu kan hre theuh awm e.

Tun hunah emaw hun lo la kal zel turah emaw eng hunah pawh zankhat mitchhin lo tawh ta thut ila, kan ruang chung a thusawi tuten Kolkata-a a awm lai chuan tiin tawngkam rawn chhuah ta se, sawi tur hre mang lovin kan thatna lai a rawn phuahchawp mai mai dawn nge, Kolkata kan awm laia kan thil tih that te darkar chuang fe sawi tur a nei zawk ang? Thlalaknaah Kolkata-a a awm laia a thianten thla lakpui rawh se rawn ti ta se, i kuang thlalakpui tura rawn dingchhuak an awm mang dawn lo nge, dinna hmuna in chan lo khawpin an rawn dingchhuak dawn? Heng zawng zawng hi hre reng la, i duhthlanna hmengin Kolkata-ah hian hun hmang ang che.

"Khawvelah hian mi fel famkim tumah kan awm lo, miin i fel lohna aia i felna lam sawi tur an ngah zawk chuan mi fel i ni mai"

(Article tha tak tak kan dawng thin a, heng kan article dawn te hi a tahtawlin kan tarlang thin a. Article rawn zia thin tu te'n in thuziah rawn chhuah hun hi in lo nghak hram hram thin dawn nia.

Tin, kan rilru leh ngaihtuahna te thua chantir a, midang hriattir ve duh chuan engtiklai pawhin **kmschuailo@gmail.com** lamah a thawn theih reng a ni e. -Editor)

Moyes out!!!

Manchester United chuan an manager tunhnaia an club chetchhiat pui em em tu, Scottish mi David Moyes chuan thla 10 a enkawl hnuin Dt.22.04.13 khan an ban ta a ni. David Moyes hian Manchester United hi Game 51 khelh puiin, wawi 27 a chak pui a, wawi 9 draw puiin, wawi 15 a chakloh pui a ni. Moyes hi Manchester United manager ni tawh zinga Manager ni reilo pathumna a ni a, kum 82 chhunga manager ni rei lo ber a ni. Manager nghet an neih hma chuan veteran player, Ryan Giggs chu interim manager atan an ruat nghal bawk.

Michael Schumacher

Formula1 driver ropui, wawi 7 zet World Champion ni thei Michael Schumacher chu Dt.29.12.13 a vur tawlhna hmuna a chetsual hnu atang khan wawiin thleng hian nikhua a la hre lova. Hetihlai hian, Dt.17.11.13 vel bawr Spain rama Seville khua Bormujos bula a car hawh Audi A4 a motorcyclist Francisco M.A a sut avangin thubuai an theh lut thar bawk a. A harh chuak thei a nih chuan court lamah a inlan ngei a ngaih a rinawm. Bike khalhtu hi a banrek ruh a tliah bakah, a bike hi a chhe nasa hle bawk a ni.

Bengaluru FC

India ram Club level Football inelna sang ber I-League-ah Bengaluru FC chu an champion ta. Bengaluru FC hi I-League an vawikhat khelhnaah an Champion nghal thei a, hetiang ti thei hi Bengaluru FC tih loh chu I-League hian a la hmu ngai lo a. Tun season-ah erawh Bengaluru FC hian I-League record siamin, season khatnaah an rawn Champion nghal a ni. Bengaluru FC-ah hian mizo pali Lalrozama Fanai, Lalengkima Aizawl ve ve leh Beikhokhei Beingaichho, Saiha khua leh Siam Hanghal, Churachanpur khuate chu an khel mek a ni.

Varthansangi Memorial Football

FC Ballygunge huaihawt, Varthansangi Memorial Football Tournament chu Dt.16.04.14 khan khelh zawh a ni ta a. He Tournament a tel team hrang hrang te an intumkual vek hnua Point hmu sang pahnih, FC Ballygunge leh SA Boys' te chuan Final an khel a ni. He Finalinkhel hmuhnaawm takah hian tan 1st FCB lam atangin LR-a goal hmangin hma an hruai char char a, Second Half-ah SA Boys' lam atangin Hmingthana chuan penalty hmangin a sut veleh a. Hun pangngai zovin, hun pek belhah pawh an la inhneh tawk zel avangin Penalty hmanga chak zawk zawn a ngai ta a. Penalty Shootout-ah FC Ballygunge chuan 6-5 in Sa Boys' an hneh a, Varthansangi Memorial Trophy chu an chawi ta a ni.

Barca-in chhiat tawk

Barcelona coach hlui, Tito Vilanova chu Dt.25.04.14 khan cancer natna avangin a boral a ni. Tito Vilanova hian Barcelona chu July 2012 atang khan enkawl tan in, July 2013 khan a cancer avangin a hna a bansan ta a ni

I knew it was a great mistake for men like me to fall in love.... BUT!

-Zuliasa

Nulate u, kan nu awm leh awm loh chu a inthlau viau lo maw?

- Pu Bena c/o CMCS

Lukira min ti reng bik mai ninawm hlawm lutuk ka BMX thla in lak pui tawh miah lo ang.

- Chhuanga @ Kestopur

Easter Sunrise Service chu boring tep mahse, ei leh in lam kha chu a nuam khawp mai.

-Ruatkima Salvos, SA Boys

Thinlung na atanga hla phuah lama mi chunga leng kan ni bawk a, Taylor Swift leh Adele te nen hian huang khata khungkhawm tur chi kan ni.

- Temami

Function awm dawn reng rengin kan Perform thei reng e...

- NIFT Girls

Computer thar atang duh hun huna online chu lerh a awl dawn hle mai...!!!

-Gerald

Single in ka lo chhuk a, Single bawkin ka chho leh dawn a nih hmel...

- Mapuia, Ex. Fin. Secy.

Car thar chuan Chicks a chhawm hnem hle mai...

- Pu Zuia @ Mizoram House**(Zirna Huang chhunzawmna..)**

Eng stream atang pawhin zir theih a ni. MBA degree leh hospital administration degree nei kawp tan phei chuan damdawi in lian tak takah mamawhna a tam hle a ni.

Heng ka tarlan te bak hi paramedical course tam tak a awm a. Health care tha hi doctor leh nurse neih that ringawt a ni tawh lo a. Khawvel changkang zawkah chuan allied health service hi a tha em em a. Hetiang ang zir chhuak kan neih tam hunah hian kan health care system hi a lo tha zawk ang tih hi ka ring tlat a ni.

Source: <http://admissions.cmcvellore.ac.in>